

Lëtzebuerg, den 3. Abrëll 2023

Här Fernand ETGEN
Chamberspräsident
LËTZEBUERG



DEMOKRATESCH
PARTEI

Chambre des Députés
Groupe Parlementaire

Här President,

Esou ewéi den Artikel 80 vum Chambersreglement et virgesäit, bieten ech Iech, dës parlamentaresch Fro un den Här Minister fir Mobilitéit an ëffentlech Aarbechten weiderzeleeden:

„Zanter Joerzénge ginn d'Führerschäinsexamen an der Nordspëtzt vum Land zu Wootz an an der direkter Ëmgéigend ofgehalen. Dat erspuert deene Jonken aus de Kantone Wootz a Clierf wäit Weeër bis an d'Nordstad. Lo soll et awer an noer Zukunft sou sinn, datt dës Exame just nach am Kanton Dikrech sollen ofgehalen ginn.

Well d'Schülerinnen an d'Schüler beschtméiglech op hir praktesch Prüfung virbereet solle ginn, missten si da meeschtens am Raum Nordstad mat der Autoschoul trainéieren. Fir déi Jonk aus dem Éislek an dem Réidener Kanton bedeit dat awer een enormen Zäitopwand, well se dacks 40 bis 50 Kilometer fuere mussen, bis datt si zu Dikrech oder Ettelbréck ukomm sinn; kaum ze schwätze vum zousätzlechen Trafic, deen doduercher entsteet.

An deem Kader wollt ech dem Här Minister fir Mobilitéit an ëffentlech Aarbechten folgend Froe stellen:

- Stëmmt et, dat d'Exame fir de Führerschäin am Nordbezierk an Zukunft nëmmen nach an der Nordstad ofgehalen solle ginn?*
- Wa jo, ass den Här Minister net bereet, fir dës Entscheedung am Sënn vun der Dezentraliséierung a vu manner Ressourceverbrauch ze iwwerdenken?*
- Ass et méiglech fir zesumme mat der Stad Wootz nei Raimlechkeeten ze sichen, déi et erlaben, dës praktesch*

9, rue du St. Esprit
B.P. 510
L-2015 Luxembourg

Tel. : 22 41 84 1
Fax : 47 10 07

dp@dp.lu
www.dp.lu

*Examen weiderhin an der Ardennenhauptstad
z'organisieren?“*

Mat déiwem Respekt,

A handwritten signature in blue ink, appearing to read 'Bauler', with a stylized flourish at the end.

André BAULER
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de la Mobilité
et des Travaux publics

Äntwert vum Minister fir Mobilitéit an ëffentlech Aarbechten op d'parlamentaresch Fro n° 7862 vum 3. Abrëll 2023 vum Här Deputéierten André Bauler.

Den honorabelen Deputéierte stellt eng Rei Froen am Kader vun der Organisatioun vun de praktesche Führerschäinsexamen am Norde vum Land a speziell an der Stad Wolz.

Grondsätzlech ass an dësem Kontext ze soen, datt e Führerschäin net regional beschränkt ass. Wann eng Persoun duerch e prakteschen Exame kann noweisen, datt si ka mat engem Auto am Stroosseverkéier deelhuefen, esou dierf dës Persoun, wann si den Exame gepackt huet, op sämtlechen ëffentleche Stroossen am In- an Ausland fueren. Deemno muss bei der Preparatioun op e prakteschen Exame mat enger Fahrschoul sécher gestallt ginn, datt dës Persoun och tatsächlech an alle Situatiounen hiert Gefier an och de Code de la Route beherrscht. Dëst ass onofhängeg dovunner ob eng Persoun ganz am Norden oder ganz am Süde vum Land fiert, a bedeit och net, datt eng Persoun bei all Fahrstonn spezifesch Strecken an enger Regioun offuere soll wou potentiell kéint den Examen ofgehalen ginn. Méi wichteg ass et, datt dës Persoun sämtlech Zorte vu Stroosse kenne léiert an dës optimal beherrscht a weess wéi een sech ze verhalten huet.

Wat den Exame selwer ugeet esou ass et och oft esou, datt d'Kandidaten nach virun dem Examen eng Fahrstonn hunn an deemno selwer a Begleedung vum Fahrlehrer bis op d'Plaz fuere wou dësen ofgehalen gëtt, wat an dësem Zesammenhang dann och kee verluerenen Trajet duerstellt. Déi aner Regioun vum Land hunn zwee Examenssitten zur Verfügung (Sandweiler an Esch-Uelzecht), an do huet et sech erausgestallt, dass dat fir d'Kandidaten aus dem Süden, Osten, Westen an Zentrum kee Problem duerstellt, och wa Verschiddener wäit vum Examenszenter wunnen. An dësen Zesammenhang sief dann och nach eng kéier op d'Äntwerten op d'Question parlementaires élargie n°182 verweisen, wou och analyséiert gouf wéi gutt déi verschidde Sitten vun der SNCA am Land mat der neier Opdeelung ze erreeche sinn.

Wat de Site vum Fridhaff ubelaangt, esou ass dësen am Sënn vun enger nationaler Dezentraliséierung vun den Aktivitéite vun der SNCA gebaut ginn a regroupéiert dofir och all Servicer vun der SNCA op enger zentraler Plaz am Norden, wat dem gesamte Ressourceverbrauch entgéint kennt. D'Führerschäinsexame fir den Norde ginn all vum nei Site vun der SNCA um Fridhaff ofgehalen esoubal dësen operationell ass. De Site Wolz, esou wéi déi vun Angelduerf an Dikrech ginn dann dono och zou gemaach. Momentan hält d'SNCA an der Moyenne 16 Kategorie B a BE Exame pro Woch zu Wolz of. Dat ass net ëmmer genuch fir een Examineur fir zwee Deeg voll ze beschäftegen. Organisatoresch ass et och méi komplizéiert ee klengen Examenszenter optimal ze besetze wann d'Unzuel vun den Examen esou kléng ass wéi zu Wolz, an do déi ofgesoten Examensplagen net kenne vun enger aner Fahrschoul benotzt ginn, well net genuch Kandidaten do sinn.

Deemno ass et am Moment zu Wolz och just méiglech d'Exame fir den Autosführerschäin esou wéi fir d'Autosremorque ze maachen. Sämtlech aner Führerschäiner kënnen am Moment guer net zu Wolz ugebuede ginn, well d'Infrastruktur och net Adäquat ass wat beispillsweis den Übungsterrain ubelaangt. Um Fridhaff wäerte sämtlech d'Examenskategorie kënnen ugebuede ginn.

Zousätzlech dozou ass nach ze vermierken, dass d'Examen déi hiren Départ zu Wolz huelen oft net alles ofdecke kënne wat am Artikel 4 vum Règlement grand-ducal du 17 mai 2004 sur les matières des examens en vue de l'obtention d'un permis de conduire recommandéiert ass. D'Aptitude vum Kandidat fir op der Autobunn ze fueren, kann zum Beispill zu Wolz net iwwerpréift ginn, well do keng Autobunn ass. Wann d'Examen elo fir de Norden all um Fridhaff gefuer ginn, kann am Norden och alles wat am Règlement grand-ducal recommandéiert ass iwwerpréift ginn an esou och sécher gestallt ginn, datt d'Examen eenheetlech fir sämtlech Regiounen aus dem Land ofgehalen kënne ginn.

Aus den uewe beschriwwenen Grënn ass et net geplangt weiderhin Départe vu prakteschen Examen zu Wolz ze hunn, mee dës op engem Site am Norde vum Land ze regroupéieren. Am konkrete Fall um zukünftege Site Fridhaff vun der SNCA.

Lëtzebuerg, den 19. Abrëll 2023

De Minister fir Mobilitéit an ëffentlech Aarbechten

(s.) François Bausch